



Na osnovu člana 22 Statuta Brčko distrikta Bosne i Hercegovine – prečišćeni tekst (Službeni glasnik Brčko distrikta Bosne i Hercegovine, broj 2/10), Skupština Brčko distrikta Bosne i Hercegovine, na 41. redovnoj sjednici održanoj 13. februara 2019. godine, usvaja

## **ZAKON O ADVOKATSKOJ DJELATNOSTI U BRČKO DISTRIKTU BOSNE I HERCEGOVINE**

### **DIO PRVI - OPĆE ODREDBE**

#### **Član 1 (Predmet)**

Ovim zakonom propisuje se definicija advokatske djelatnosti u Brčko distriktu Bosne i Hercegovine, prava i obaveze advokata, utvrđivanje naknada i nagrada advokata i druga pitanja koja se odnose na obavljanje advokatske djelatnosti u Brčko distriktu Bosne i Hercegovine.

#### **Član 2 (Definicije)**

Pojedini izrazi upotrijebljeni u ovom zakonu, imaju sljedeće značenje:

- a) „advokatska djelatnost“ je nezavisna profesionalna djelatnost pružanja pravne pomoći fizičkim i pravnim licima;
- b) „advokat“ je lice koje je upisano u imenik advokata Advokatske komore, koje je položilo advokatsku zakletvu, odnosno dalo svečanu izjavu;
- c) „advokatska komora“ je Advokatska komora Republike Srpske i Advokatska komora Federacije Bosne i Hercegovine;
- d) „stranka“ je domaće ili strano fizičko ili pravno lice koje su advokatu obratilo za pružanje pravne pomoći i lice koje advokat zastupa ili brani.

### **DIO DRUGI - OBAVLJANJE ADVOKATSKE DJELATNOSTI**

#### **Član 3 (Advokatska djelatnost)**

Advokatska djelatnost obuhvata:

- a) davanje usmenih i pismenih pravnih savjeta i mišljenja;
- b) sastavljanje tužbi, prijedloga, zahtjeva, molbi, pravnih lijekova, predstavki i drugih podnesaka;
- c) sastavljanje ugovora, testamenata, poravnanja, izjava, opštih i pojedinačnih akata i drugih isprava;
- d) zastupanje i odbranu fizičkih i pravnih lica;
- e) posredovanje radi zaključenja pravnog posla ili mirnog rješavanja spora i spornog odnosa;

- f) obavljanje i drugih poslova pravne pomoći fizičkim i pravnim licima kako bi se zaštitili njihova prava i interesi.

#### **Član 4 (Advokat)**

- (1) Advokat je nezavisan u svom radu i svaka stranka ima pravo slobodnog izbora advokata koji je ovlašten da obavlja advokatsku djelatnost u Bosni i Hercegovini.
- (2) Advokat ima pravo i dužnost da u okviru zakona, i u okviru ovlaštenja dobijenih od stranke, poduzima sve radnje u svim pravnim poslovima, koji su po njegovoj ocjeni, u interesu stranke.
- (3) Advokat ne smije obavljati djelatnosti koje su nespojive s ugledom i neovisnošću advokatske djelatnosti.

#### **Član 5 (Uslovi za obavljanje advokatske djelatnosti)**

- (1) Advokati sa sjedištem u Brčko distriktu Bosne i Hercegovine će biti članovi Advokatske komore Republike Srpske ili Advokatske komore Federacije Bosne i Hercegovine do donošenja Zakona o advokaturi Brčko distrikta BiH i osnivanja Advokatske komore Brčko distrikta Bosne i Hercegovine a čije se osnivanje i donošenje predviđa u roku od tri godine.
- (2) Advokati biraju advokatsku komoru u koju se učlanjuju.
- (3) Prava, obaveze i odgovornost advokata, utvrđuju se ovim zakonom i propisima koji uređuju advokatsku djelatnost i rad advokatskih komora u Bosni i Hercegovini.

#### **Član 6 (Naknada i nagrada advokata)**

Advokat ima pravo na nagradu i naknadu troškova za svoj rad u skladu s tarifom koju donosi advokatska komora u kojoj je advokat član.

### **DIO TREĆI - ZAVRŠNE ODREDBE**

#### **Član 7 (Prestanak primjene)**

Stupanjem na snagu ovog zakona prestaje primjena

- a) Tarife o nagradama i naknadama troškova za rad advokata Republike Srpske (Službeni glasnik Republike Srpske, broj 45/00);
- b) Tarife o nagradama i naknadi troškova za rad advokata u Federaciji BiH (Službene novine Federacije BiH, broj 67/02).

#### **Član 8 (Stupanje na snagu)**

Ovaj zakon stupa na snagu osmog dana od dana objavljivanja u Službenom glasniku Brčko distrikta Bosne i Hercegovine.

Broj: 01-02-539/19  
Brčko, 13. 2. 2019. godine

PREDSJEDNIK  
SKUPŠTINE BRČKO DISTRIKTA BiH  
**Esed Kadrić**